

18/10/2001

Syor lucut jawatan menteri, ketua jabatan abai tugas

Ahmad

KUALA LUMPUR, Rabu - Seorang penyokong kerajaan hari ini meminta Perdana Menteri, Datuk Seri Dr Mahathir Mohamad, melucutkan jawatan mana-mana menteri yang tidak menjalankan tugas seperti dipertanggungjawabkan.

Datuk Bung Mokhtar Radin (BN-Kinabatangan) berkata, banyak aduan dan kritikan diterima daripada peringkat akar umbi mengenai kegagalan sesetengah menteri dan ketua jabatan menjalankan tugas.

"Kita pada peringkat akar umbi banyak menerima laporan adanya golongan ini yang janji sana dan janji sini tetapi tidak melaksanakannya.

"Kadang-kadang muka mereka (menteri) pun tak nampak dalam Parlimen. Kalau ada rombakan Kabinet, tukar saja orang ni. Yang layak masih ramai yang berwibawa dan berkebolehan," katanya ketika membahaskan Rang Undang-Undang Perbekalan 2001 di Dewan Rakyat, hari ini.

Katanya, kerajaan memerlukan menteri dan pegawai tinggi yang cekap dan berupaya menjalankan tugas dengan baik dalam usaha membangunkan negara.

"Kalau ada (orang seperti ini), kita lapor dan buang mereka. Mereka ini diibaratkan seekor kerbau membawa lumpur, semuanya terpalit," katanya.

Bung Mokhtar juga meminta kerajaan mengkaji semua struktur pengurusan pentadbirannya bagi memastikan pelaksanaan dasar yang lapuk dan tidak mendatangkan faedah dihentikan.

Isu itu turut menarik perhatian Datuk Mohamad Aziz (BN-Sri Gading) yang berkata, walaupun ramai menteri terdiri daripada golongan berdedikasi, ada juga segelintir tidak menjalankan tugas yang diamanahkan.

Katanya, sesetengah ketua jabatan dan kakitangan kerajaan juga tidak mengendahkan arahan menteri sehingga menyebabkan beberapa pelaksanaan dasar tidak dapat diselesaikan sehingga kini.

Datuk Dr Yusof Yacob (BN-Sipitang) pula berharap pegawai kerajaan lebih efisien dalam mengendalikan projek yang dipertanggungjawabkan kepada mereka.

"Kalau lihat ada antara prosedur pelaksanaan projek itu boleh melambatkan perjalanan projek, gantikan prosedur itu kepada yang lebih baik," katanya.

Yusof juga berkata, beliau mendapati perbincangan rang undang-undang itu yang dibentangkan sejak semalam menimbulkan banyak perbalahan apabila pembahas di kalangan penyokong kerajaan dan pembangkang, terutama Pas bercakap mengenai isu Amerika-Afghanistan.

"Sepatutnya, sebagai orang Islam, kita tanpa mengira parti harus berkongsi pendapat serta mengemukakan cadangan terbaik bagi menyelamatkan rakyat Afghanistan yang tidak berdosa.

"Berdemonstrasi tidak ada gunanya," katanya yang merujuk tindakan Pas untuk berdemonstrasi dan cuba menunaikan solat hajat di hadapan pejabat Kedutaan Amerika di Jalan Tun Razak di Jumaat lalu, sebagai sia-sia.

(END)